

ARLeF: apel al Ministri Patuanelli pe programazion Rai par furlan

Su 11.800.000 euros pe sede RAI regjonâl, dome 200.000 a van al furlan. Te Convenzion Guvier-RAI a mancjin notiziaris e trasmissions televisivis in marilenghe.

“No si pues plui acetâ la disparitât di tratament che a patissin i citadins di lenghe furlane te programazion de RAI regjonâl. Ae fin dal mês e scjadarà la Convenzion tra Guvier talian e Rai, firmade intal 2017 e plui voltis sprolungjade, su la programazion de RAI regjonâl. O domandìn duncje garanziis par che il Guvier - e in particolâr il Ministri competent Stefano Patuanelli - al intervegni par meti in vore la leç statâl di tutele che e à za plui di vincj agns e che fin cumò no je mai stade rispietade”.

Al è chest l’apel che il President de ARLeF, Eros Cisilino, i fâs al Guvier e al aministradôr delegât RAI, Fabrizio Salini, par evitâ che la Convenzion RAI e puedi jessi sprolungjade une altre volte cence che si corezin lis claris violazions de normative di tutele de lenghe furlane. Passe vincj agns fa, di fat, cu la Leç 482/99 il Stât al veve decidût di inviâ trasmissions sedi radiofonichis che televisivis in lenghe furlane ma, pal moment, a son previodudis dome pocjjs oris di trasmissions radiofonichis, intant che la convenzion in vore no dîs propit nuie su lis trasmissions televisivis.

“Par capî – al va indenant Cisilino – cetant pôc al è stât fat fin cumò des autoritâts centrâls pe nestre comunitât, al baste confrontâ i dâts dal furlan (fevelât di plui di 600.000 di lôr), cun chei dal sloven (50.000), dal ladin (30.000) e dal todesc (300.000). Pal furlan a son previodudis dome 90 oris ad an di radiofonie, intant che pal sloven 4.517 oris, pal ladin 352 e pal todesc 5.300. Se si considerin lis oris di television, il furlan al è a zero, intant che a son previodudis 208 oris pal sloven, 100 pal ladin e 760 pal todesc. Pal furlan, cun di plui, no son previodudis trasmissions di gjenar informatîf, fundamentâls pe promoziun di une lenghe minoritarie. In fin, se o cjalin i finanziaments, su 11.800.000 euros assegnâts pe sede RAI regjonâl, dome 200.000 a vegnis destinâts al furlan e dut il rest al va aes trasmissions par sloven e par talian. Mi somee duncje une vore grande la injustizie che e je daûr a patî la nestre lenghe”.

“Che al sedi ben clâr – al siere Cisilino – che no domandìn di diminuî lis oris par chês altris minorancis, ma o pretendìn che a sedin stanziâts dal Guvier fonts juscj par garantî al furlan almancul la stesste presince previodude pe lenghe ladine. Par chest, ancje la ARLeF e da la sô poie e si unis ae azion che a son daûr a puartâ indevant il President dal Consei regjonâl Piero Mauro Zanin e l’Assessôr aes minorancis linguistichis de Regjon Pierpaolo Roberti, par domandâ un confront imediât al Guvier e ae RAI su cheste tematiche delicate. L’argument al stât ribatût di pôc ancje dal President de Assemblee di Comunitât linguistiche furlane Markus Maurmair, e za tratât timp indaûr intune petizion mandade al Guvier e firmade di plui di 70 sindics che a fasin part di chês stesste Assemblee”.

INFORMAZIONS PE STAMPE - INFORMAZIONI PER LA STAMPA


Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<

Trasmissions RAI intes lenghis minoritariis (2019)

Lenghe	Furlan	Sloven	Ladin	Todesc
<i>Locutôrs</i>	<i>600.000</i>	<i>50.000</i>	<i>30.000</i>	<i>300.000</i>
Finanziament	€ 200.000	€ 11.600.000	€ 2.653.000	€ 17.347.000
Oris tutele Radio	90	4.517	352	5.300
Oris tutele Television	0	208	100	760
Notiziaris radio	0	8	2	11
Notiziaris tv	0	1	2	2

Finanziament dal Guvier ae RAI par programs tes lenghis minoritariis (2019)



Udin, ai 18 di Avrîl dal 2020

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / e-mail: arlef@caltpr.it
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<